


南鄭鄉土志

(二)



陝西省圖書館	藏書
書號	D631 673.3
卷號	原 12856

00820

耆舊錄事業學問二類

附 名宦 鄉賢 忠義 節烈
事業

北魏

姜漾姜承弟亦善士性至孝為漢中所歎服

北齊

皇甫和字長諧徽子年十一而孤母夏侯氏才明有禮親授
經書及長深沈有雅量尤明禮義宗親吉凶多相咨訪卒
於濟陰太守

唐

李貞古以孝友著名肅宗寶應元年梁州刺史臧希讓上言李貞古孝行彰聞請付所司旌表從之貞古六歲而孤母欲改嫁貞古泣留之母遂守志及母歿負土成墳廬於墓側有猛虎馴於廬前白雀見於墓門村人異之

明

張體道張羽之孫字行菴舉人以孝友著郡丞傅希孟延請之能以正言規丞卒成長吏又善居鄉里人莫不敬愛

王敦直邑諸生事親孝母歿屏酒肉及菘猶苦塊畫像母側如兒時依戀父歿哀毀幾絕復畫已像拜父前晨昏

侍俸如生時自題其軸曰居憂圖

董官策邑庠生稟性忠孝事父與繼母待諸弟人無間言明甲申聞李賊之變仰天痛哭絕而復甦遂取衣冠書籍焚之不出應試設館授徒一日於路拾遺金端坐赤日中俟失金者至還之其人分金策笑而不受

國朝

李一鰲喪母有孝名進士為大名令事父篤孝後歷升布政使設親位日上食居家亦然至老孺慕不衰

趙光顯為人敦厚退讓里黨交推性篤孝母王氏年逾七十卧病不起光顯日夕祈禱封左股肉和藥以進病立愈郡守滕天綬表其閭曰克敦彝倫其歿也里人為之共勒賢孝

碑馬

朱子茂性至孝避寇山中遇賊欲劫其父之茂涕泣哀求賊脅以及不懼歎曰孝子也釋之父得無恙生平尊尊為善稍有贏餘即以助親隣之不足乾隆八年 旌表

焦湧字耀然早孤事母至孝家貧負販以養有女弟母鍾愛之湧曲為承順母或不悅輒伏地求歡俟色霽乃起母病夜祀神願以身代及母卒哀毀逾禮子廷遴以進士任守備 覃贈如其官人謂孝德之報云

樊珍樂善好施扶危濟困嘗舍基地作草塘寺巷官路行者便之為立義路仁蘭牌坊子德輝以孝聞父沒廬墓

三年登乾隆壬午鄉榜借補訓導孫起鳳亦由選拔官廣文人以為積善之報

萬鵠程字扶九庠生篤學嗜古尤以孝友聞於鄉生平尚義好施凡利人濟物之事知無不為閩邑皆稱善士

呂飛熊字夢叶庠生性純孝父遠游飛熊迎數百里外其孺慕如此慷慨尚義鄉里文風賴以丕振橋梁道路賑乏恤孤義舉尤不勝述云

趙昶字旭生庠生性端方家貧好學不倦父卒事母至孝中年喪偶佐餒無人昶親俸甘旨未嘗一刻離膝下兄弟七人昶俱教養成立後析居財產多歸諸弟毫無德色

諸弟中有蕩失產業者昶又分所有以與之鄉里咸欽其孝友焉

劉經天武生篤於孝邑人彭綬昌有劉孝子傳詳藝文陳維璧性孝友事胞伯能盡禮諸弟化其行家庭之間怡怡如也

張廷性孝友先沒撫二孤教養婚娶如已出孤相繼天又存恤其遺孫為擇姻配篤於同氣足易薄俗焉

何其偉庠生有隱德急人之急有以千金託者間數歲終不負嘗助修高橋洞堰務於郡司馬吳何二公治舞珠柳邊滾水石壩各工時述其顛末告人亦留心濟人者矣

呂淵字靜波性至孝尤工書嗜學會父病親侍湯藥衣不解帶旋丁父憂哀毀骨立其純孝如此

魯兆鶴庠生父君弼貢生與邑人余翔漢數人友善以儒行相敦勉兆鶴守家學有父風敦品飭行楊石齋稱之曰孝友恭謹端方正直惟魯君為無愧焉

張崧年貢生性至孝父壽至八十二崧年先意承歡終身無違色父沒廬墓三年旋卒繼室項氏撫孤完貞能成夫志宗族貧不能喪娶者令子助之暑施茶寒施湯善行甚多邑人以夫孝婦賢公呈學政給匾以旌焉

朱啟麟邑廩生父闡道品端行篤推士林祭酒啟麟善承

其志父怒必愉色婉容跪請其故父悅然後起母病篤泣
禱神願以身代病旋愈人以為孝感所致

黃騰漢字天章副貢生自少以博雅稱天性孝友兄亡侍
寡嫂孤姪如一體六世同居無間言重然諾尚義疏財以緩
急告無不應者於邑中學行之士尤加意扶持焉

劉文輝父母早逝事八旬祖母朝夕相依以孝聞有李令
伯之風

楊大生貢生居家孝友疏財好施濟子洲岸生慷慨有父風
善訓導人每宣講 聖諭聽者悚然

郭振基少貧早失怙事後母最孝和厚謙光遐邇以知禮

聞重義輕財族戚賴之

張全理天性篤孝敬奉雙親出於至誠邑紳舉報孝子嘉

慶十六年 旌表

馮騰蛟生員性至孝年少繼母柴氏卧病在床醫藥罔
效騰蛟潛割左股肉以奉母病旋痊守正不阿屢為鄉里
排難解紛知府嚴如煜表其門曰至性過人

楊森居心端謹性至孝與弟鏞共事庭幃承色笑奉甘
旨得親心歡精眼科有求輒應不計其值里人稱之嘉慶十
六年 旌表

楊鏞森之弟拔貢兄弟怡怡年既壯無異孩提鏞少英

吳壯貌魁傑能文有節學使多器重之與兄同年旌表

翟義家貧事親孝日博蠅頭利以養親父稍不懌即長跪請罪必歡而後已父沒養母無怠容昆仲分爨義推讓於兄有少贏餘輒濟窮困遠近頌之額其門曰樂善不倦

李明桂家貧事親克孝菽水承歡怡然終日里人匾其堂曰能竭其力孫維聖維賢一登武科一登孝友科曾孫燭亦能以孝德著

范輅生員性至孝菽水承歡得親心之喜學政陸給匾曰人言無間復恂謹自愛不輕投刺公門蓋孝而有節者

李隆新居蘆水鄉為人端厚孝友舉鄉飲耆賓年九十餘知府嚴給閭里耆望四字以旌

陳所見庠生漢江上壩冬令架板橋夏秋設渡船所見經理其事三十餘年行人賴之

張積業秉性慈惠漢江渡船橋塌毀積業年八十餘尤盡心經理閭黨重之

王仲才與蕭鳳棋寇自興三人居漢江側南城外之上水渡船橋塌毀捐資修理往來便之

王居陽字諧鳳邑鄉飲正賓貢生樂善好施誼周族里嘉慶十四年重修漢南書院因大門舊制不合于午公

慨然以後房二間地基六分捐入書院知府嚴如煜勒石講堂
並給尚義崇文匾額

王訓字式甫府西坊人少失怙恃事庶母孝事兄嫂悌後
四子殿甲舉孝廉方正人以為孝悌所致

王肇龍邑人性至孝父病服藥不效肇龍日夜禱天願以
身代病剝割股和藥以進父尋瘳逾年父卒肇龍哀毀
逾常形銷骨立尋亦卒鄉黨哀之

陳樹楷邑人事親孝親病晝夜侍側衣不解帶且能遠
遵祖訓不到公堂雖寃亦不涉訟蓋已三世矣鄉里交推請
得 旌表

王侃候選訓導彌勒院人孝事父母出於至誠凡事能體
親心父母後先卒葬祭循禮里黨欽式後侃故其子亦以孝
聞人以為以孝傳家云

王有家字子修邑西人性至孝幼讀書粗知大義母早亡因
貧攻術學製春器以博升斗擔頭常掛二十四孝書每工
作輒為講解會父病刺腹中血作引病良已後父沒哀毀骨
立既葬臨哭百日其純孝如此

彭際順邑西人個儻有豪俠氣排難解紛一方賴之嗣度
通堰口決左邊皆受累彭因勢利導工成溉田若干畝咸
頌德焉嘉慶年太守嚴如煜深相器重之遂贈義氣流

慶四字

張裕好善舉城西有鹿洞堰溉田五千餘畝年久溝淤水不流通裕使其子步瀛率村人從源頭疏濬導水下流鄉里共利賴之

鄭永甲邑北人幼以孝聞及壯疏財好義光緒三年歲大饑鄭以其所居積者盡出以賑貧人鄉里德之以恩周族黨四字額其廬

李作霖喜神壩人品學兼優士林欽矚遇貧子家諄諄教誨鄉鄰有婚嫁無力者傾囊助之生平孝友感化一方余敬業字樂亭邑之八十畝人也以諸生保訓導兵燹後山河

堰毀水不流通公舉當道諭率民修築水利復興賦甫退尸積如山公於城門外作忠義四大塚瘞骷掩骼居者始安時漢南書院公產失契公探訪兩年收回田數百畝多士始有膏火之資焉

羅百年邑之紅廟塘人家稍裕好施每收佃戶制小斛而賑貸則用大者人皆謂有公量收私量代貸之遺風焉壽九十六卒

黃富才字大業邑之牟家壩人性孝友敦族睦姻慷慨好義夏秋置渡舟春冬建木橋且善排解鄉里有睚眦之公庭不得直者得公一言立息同治初髮逆擾公出積谷五十石

以助饗光緒三年歲大稔復捐谷數十石以救饑民公有堂弟
俊才襁抱中隨母他適稍長公百計令歸宗教以義方克自
樹立其友愛復如此

汪文元邑人生而岐嶷個儻弱冠入邑庠事母孝兵燹後
嚴樂園令辦善後兼妻修漢南書院公竭力規畫十五年
無怠容工竣復籌膏火井井有條年七十六卒紳耆溯
其賢勞請入書院之崇賢祠

汪朝興字容齋汪文元長子性孝友弟偶有忤以忍讓處
之析居時昆季紛爭公獨辭隆就窳有代為不平者則曰
吾有硯田每歲有秋何必與弟爭沃壤哉聞者咸服

黃秉鈞字衡臣邑貢生性仁孝適藍逆竄漢黃領眾禦賊
杜截之力居多公事之暇復開堰渠以利一方建宗祠以睦
一族積義穀以備荒年嚴保甲以清戶口每朔望宣講

聖諭諄諄開導一時有移風易俗之象焉年七十四卒及門
同勒德教碑

黎國富字厚甫性孝友年二十時母氏率病劇醫藥罔
效黎割股和藥以進病尋瘥後與兄分業兄取其豐者黎
不與較壽至八十有三卒子若孫先後入邑庠

學問

三國

陳術字申伯博學多聞著釋問七篇益部耆舊傳位
歷三郡太守

明

虞英宣德庚戌進士博學工文以泉石自娛其孫延璽
登癸丑進士歷官運使

國朝

宋師濂廩生學有淵源性方嚴師道克立邑知名士多
出其門學徒貧者並為之經其飲食誨之尤不倦云

楚程字呈玉貞生性剛方以莊見憚鄉里有不檢者惟恐
其聞知好古篤學時手一編不置家範嚴肅舉邑推為

典型

余翔漢貞生敦品立行潛心閩洛士林重之岳副使禮在漢
崇獎師儒於翔漢尤推重之

彭綬昌庠生品行端方學有本源所著古文有沈鬱之氣
邑中文行士多經指授墓門松楸弟子相為培護焉

李天叙字典章操行醇篤以古人自期博學善屬文有
漢南才子之目登癸卯鄉榜丁丑捷南宮未及赴

廷而卒士林惜之

丁南英字麗午自少以學行稱名噪遠近善造就後輩
邑中能文之士多出其門顧屢試不售以明經老知者

咸稱屈

楊瓚歲貢生性廉潔介然有守善琴操潛心性命學有淵源其教一本考亭致力日用行習不尚以文詞訓詁為事官通渭訓導及門以理學正宗推之

李蕙字香亭邑諸生學問精粹教人必嚴雖貧不計修金一生持袁了凡功過格不怠所生二子長即都人士所稱東園先生也學有淵源知名士皆出其門有二十四孝詩行世

名宦

漢

李頡漢中南鄭人以儒學稱官至博士

李邛字孟節父頡以儒學稱邛襲父業游太學通五經善河洛風星和帝時竇憲納妻郡國皆有禮慶漢中郡當遣吏戶曹邛力諫不聽請自行所在遲留至扶風而憲就國凡交通者皆坐免太守獨不與焉後官至司徒旋封涉都侯邛辭不受年八十餘卒於家

李固字子堅邛之子也少好學常改易姓名杖策驅驢負笈從師不遠千里每到太學密入官府定省父母不令同業諸生知其為邛子也順帝陽嘉四年大將軍梁商辟為從事中郎六年商卒梁冀繼之荆州盜起以固為刺

史後為冀所憾徙固為泰山太守建和元年梁冀使馬融草奏誣與妖賊劉鮪交通遂收固下獄死於獄固正色立朝為漢名臣事詳本傳

李燮字德公固之子固初下獄知禍不免乃命三子歸喪時年十三匿徐州酒家為傭梁冀誅遇赦還鄉召為議郎後官河尹忠直有父風詳本傳

李歷字季子郃弟子清白有節博學善交為新城長政貴無為時天下大旱縣界特雨官至奉車都尉

李法和帝時舉賢良除博士遷光祿大夫上言宦官權重椒房寵盛忤旨免後徵諫議大夫正言危論不改其舊終汝

南太守

趙宣字子雅出自寒微溫良博雅太守犍為楊芳深器異之遂舉孝廉官至犍為太守

趙瑤字元珪宣之子凡七兄弟皆以令德著聞始為緱氏令遷扶風太守後徙蜀郡司空

趙琰字稚珪宣之子始為青州刺史部下清肅徙梁相徵拜尚書不就卒

張亮則字元修為牂牁太守威著南土永昌越雋夷謀欲反畏亮則而止號曰卧虎遷護羌校尉暨隆集校尉後徙梁州刺史又為魏郡太守所在皆稱治

三國

李休字子朗有智畧張魯前為鎮北將軍休為司馬家南鄭會魯敗太祖以其勸魯內附賜爵關內侯歷上黨鉅鹿二郡還拜議郎

李勝字公昭休子少有才智與曹爽善爽輔政勝為洛陽夏侯淵為征西將軍以勝為長史淵亦宿與勝厚駱谷之役議從勝出由是司馬懿不悅累遷滎陽太守河南尹皆稱職爽敗勝亦被誅

北魏

張元亮便弓馬善戰鬪以勲封撫夷縣開國子

姜永善彈琴有文學與夏道遷歸魏授員外郎梁州別駕

皇甫徽列傳安定朝那人其先因官寓漢中遂為南鄭人魏正始二年隨其妻父夏侯道遷入魏道遷別上勲書欲以徽為元謨徽曰創業之始本不闕預雖貪榮賞內愧於心拒而不許梁州刺史羊靈祐重其敦實表為征虜府司馬卒

北周

趙江性方嚴有度量歷官驃騎大將軍封昌國縣伯諡曰貞

趙文表江子少而修謹志存忠節便弓馬能左右馳射

好讀左氏春秋畧舉大義起家為周文親信累遷光祿大夫遷許國公後因討平獠夷遷蓬州本史政尚仁恕獠懷之又進位大將軍爵為公子仁溥襲爵

宋

楊從義字子和由鳳翔徙居梁洋間慷慨有氣節以功名自許由進武校尉封安康郡開國侯詳見侯神道碑

元

李孟字道復上黨人父唐歷仕秦蜀因徙漢中生而敏悟七歲能文博學強記貫通經史家居授徒遠近從之武宗至大三年以孟為平章政事同知樞密院事四年命

中書平章李孟領國子學是年仁宗即位賜爵秦國公後英宗立以鐵木迭兒讒搆盡奪前後封爵制命左遷為集賢侍講學士欲因其不就中害之孟欣然拜命由是無敢言者孟為元宰相事詳本傳

李獻孟之子御史中丞同知經筵事

明

柳申洪武初拜大名太守為政務推經術尚德緩刑郡人至今首稱之

吳偉少敦敏好學曉暢事機領洪武甲子鄉薦知茂州多善政羗人懷服累官四川左布政使

王信字君實正統中襲寬河千戶累功陞指揮使移守荆襄石和尚劉千斤反信被圍饋絕夜半以死士出城持礮擊賊賊潰斬獲甚眾以功進鎮國將軍都指揮同知鎮臨清後以老辭上慰留特遷都督同知進榮祿大夫賜玉帶出鎮三十年鈴閣之下寂無人聲其子繼善從善皆登進士楊洪字宗道漢中衛百戶也善騎射累立邊功以指揮鎮宣府寇畏之呼為楊王封會昌伯景泰三年破寇進爵為侯卒贈穎國公謚武襄

郭錡舉人任河南訓導升解州學正律身清謹教士有方劉瑾聞其名聘之錡托疾不應後瑾誅錡獨不坐累

張羽字伯翔進士授行人正德初宦官劉瑾以同鄉干公公不進後巡按山東會中官導上游獵上書力諫不聽出守廣平建漳川書院又建閘通水開田萬頃以利民生後升至上部侍郎展修國學督皇陵壯麗完固裁省節儉不下億萬自行人至司空歷官三十年清貧如洗

朱綬嘉靖癸未進士以行人出使却宗藩之贈為御史多所陳諫時兵馬司門內地湧血莫敢上聞綬特疏規諷中外疑之卒日囊空幾不能治棺時人服其清節

王言字斗廬解元為徽州教授升國子博士考選御史直道觸時相轉安綿道僉事屹然岳立人難干之以私

李佩進士官郎中儲餉恤刑能裕國活民

席上珍嘉靖進士博學能詩官戶部郎中出守永平人稱慈惠

傅應詔進士歷官參政持正獨立比歸行李蕭然

邢恩性剛介苦志篤行諸生時見重於洪太保歷官主事

清操不易弟綸舉人令孟津廉靜果毅後守柳州惠政益

彰時人號為二難

白豸舉人為崇明令潔已恤民民為立祠

秦時吉進士官御史直言敢諫名重一時

毛一鳳隆慶舉人任山西蒲縣令加意人文雅魯悉知絃誦

舒鵬翼隆慶舉人知鄆西縣以卓異擢御史見事輒奏人方之朱雲

任祿字中菴舉人歷官龍安知府獨凜四知苞苴屏絕

王屏舉人官同知性剛直事不合義決不苟為以忤當事

遷長安

甘學書萬曆舉人歷官趙州知州礦璫肆虐上書抗顏爭論

遂以誣枉被逮廷杖天啟間事雪贈尚寶少卿

張允升羽之孫進士耿介敦樸為蜀司理力持古節擢御史

以直言名於時倭小西飛乞封疏斥其罪鄉居恂恂里人賢

之

王堯民字太僕萬曆進士官東昌知府時羣媚魏璫立生祠堯民拂衣歸崇禎朝起為荆南副使未幾請歸一身清介所至多有惠聲

王懋學進士令諸城政在撫輯歷升兵部員外職司督捕京畿肅清

金煉色進士任河內令剛明果斷掾吏有關白甫至前輒止之曰吾為堯若說吏俯首塞嘿無一事豐蔀者當事檄河內運豆餉邊力爭之乃得豁

王辰漢中衛指揮使隆慶時西鄉星子山寇何勉作亂辰奉命征勦奮勇赴敵斬首十五級生擒趙轉子等二

人以功升營守備生平嗜學有儒將之風

按通志明正統間河南知府虞瑄南鄭人舊志選舉人物並未載俟考

國朝

黃閣開順治戊子拔貢授江西廣信府通判清廉自矢捕盜安民後調補河南理問剔弊釐奸執法平允民為立碑頌德尋以入覲卒於京

呂涵字襟漢舉人知福建惠安縣極意拊循歲旱虔禱願減已壽以活萬民隨得雨邑人感泣後以勞瘁得疾卒於官惠人為立祠於邑之科山塑像祀之

楚文環字果齋楚理子為諸生時即以學行知名成
進士官福建甯德令邑隸海濱俗散民偷墾下車以
經術飭吏治興文教立義倉化悍訟弭盜賊兩期之內
甯俗頓革人文蔚起邑人感戴之

鄉賢

漢

樊志張號多能隱身不仕嘗游隴西時段熲出征西羌請
見志張其夕軍為羌所圍用志張計破羌因以壯聞又言
其人宜翼聖朝以備咨誨有詔徵會病終

衛衡字伯梁少師樊志張以高行聞三徵不應董扶任安

從洛還過見之勸其出任衡笑曰時有險易道有隆污
若樊季齊楊仲桓雖應徵聘何益於時乎苟無所則尼
軻栖栖是以君平子真不屈其志其予之徒也哉卒不仕
程包字元道靈帝光和三年巴郡板楯復叛寇掠三蜀及
漢中諸郡帝遣中丞蕭愛督益州兵討之連年不克乃問
益州計吏考以征討方略漢中上計包對策云板楯屢次
忠功本無惡心長吏鄉亭更賦至重僕役筭楚過於奴
虜亦有嫁妻賣子或乃至自頸割雖陳冤州郡而牧守
不為通理闕廷悠遠不能自聞含怨莫伸故邑落相聚以
致叛戾非有謀主僭號等事今但選明能牧守自然安

集不煩征伐也帝從其言即皆降服

祝龜字元靈年十五遠學汝穎能屬文太守張府奇之曰
吾見海內士多矣無如祝龜者也州牧劉焉辟之不得已行
授葭萌長撰漢中耆舊傳以著述終

宋

楊冲遠元符中張浚試吏與元與楊用中別問曰公嘗往
來梁洋其人士有可與游者乎用中曰與元楊冲遠可以為
師矣後至遂與訂交

明

馬驥府吏也巨寇藍鄙嘯聚鹽場甚猖獗都御史調遣
兵未至莫敢櫻驥奮然捧檄入賊穴宣諭利害招降賊首

牛長子等十八人地方以甯都御史至記功咨用驥終不仕

趙思遠未詳里居應童子試輒冠軍有陳長復者隴西
才士游漢南與之締交歸隴而思遠死以文祭之其辭甚
哀切而稱嘉者亦甚至思遠當為積學敦行篤於性情之人
惜無能舉其軼事者

程秉智貢生少英異有文翰未冠入邑庠食餼氣宇温
和品行修潔士論韙之

丁應徵由吏員銓廣西泗城府經歷不就精醫理全活甚
衆教子有義方貢生南英蜚聲藝苑其第三子也

羅大程貢生品行端方教人必先心術嘗曰從我游者一

生善惡成敗皆由於我教弗謹乎勤於訓迪造就者不少
謝茂林端方正直勤儉誠篤訓弟與子姪皆列膠庠
馮通生員和厚謹恂與人無忤敦品飭行樂善好施軍興
時東關居民千餘戶時有風鶴警議修堡募勇守城挖
濠通首先捐貲大吏駐漢者咸嘉其義後復捐銀助漢
南書院生徒膏火焉
陳琚貢生勤於訓課從遊頗多方行矩步無愧人師
黃一鶴字松亭邑諸生清儉持身讀書以實行為則常置
功過格於案頭每日記之初猶功過相等繼遂過少而功多每
逢朔望恭講

諭循循誘人鄉人見之無不肅然

忠義

漢

段崇字禮高太守鄭厯命為主簿涼州羗入漢中從厯屯褒
中厯欲戰崇諫不可厯不聽出戰敗績崇及子勅况子伯生
等皆死羗遂得厯殺之

燕邠字元侯為刺史卻儉從事使在葭胡與從事董馥張
引同行儉為黃巾所殺邠聞之說馥引赴難二子不可邠歎
曰使君已死用生何為獨死之州牧劉焉嘉之為圖像學宮
誅馥等

趙嵩字伯高事太守蘇固固為米賊張修所殺嵩痛
之仗劍入修營殺十餘人幾獲修死

晉

張威梁州人初梁有王如餘党之難刺史張光遣使求救
於楊茂搜搜遣子難當救之難當為亂光死城陷威曰吾不
殺賊非夫也即起部兵鼓以忠義遂逐難當

北魏

李忻榮梁秦二州刺史莊邱黑死夏侯道遷與忻榮及龐
樹張元亮等謀以梁州附魏梁華陽太守尹天寶率眾向
州遂圍南鄭忻榮與龐樹擊尹天寶同時戰歿封其子

建為清水縣開國子

明

方孝儒字希古為漢中教授後詔為翰林博士尋進侍講
天下咸仰之建文時柄用典禮定制銳意太平值靖難師
入仗節不屈前朝忠節首推孝儒漢中建祠文廟之左祀
以春秋上丁

胡汝寧漢中衛指揮精於韜畧升四川守備會氏叛調赴

綦江至綦城破甯與叅將房嘉陵等力戰死之

席增光號旦菴席上珍之孫崇禎時解元也性秉忠孝喜

造就後學癸未聞變焚衣冠及平居所為詩入南山絕食

而死

王雲聲字長嬰進士甲申以行人奉差過里聞北變欲死者再念父鑑年衰不忍棄父死遂匿跡沔邑山中教授生徒飲泣四十餘年吳寇至迫其出不從死之日貧不能斂人咸重其忠節

葉烜邑諸生崇禎十六年李自成陷西安遣逆將下漢中烜被執罵賊磔死

潘國俊漢中衛百戶以武功歷升榆林副總兵崇禎癸未逆賊擁衆數萬臨城俊與都任尤世威等分門出戰殺萬餘拒守七日力不支城陷都任盡室自縊俊被擒奮罵不屈

十二月被殺於大教場時雲天慘暗風雪交加事載明通紀

國朝

王憲武舉授四川松潘鎮標左營把總乾隆三十七年出征金川在噶叭噠竭力死戰陣亡奉 旨卹賞

淡明志武舉授甘肅大通協營千總於乾隆四十年從征金川陣亡奉 旨卹賞

白潔邑白家口人嘉慶初年四川教匪滋擾至其村白求見匪目而誥誡之賊大怒白刀脅之白曰必不相容請少緩賊許之白入室整衣冠從容而笑曰吾事畢矣請殺我賊感動不欲殺傍一賊曰斯人留之必為後患不如殺之白廷頸受死

無懼色

何玉邑人有拳勇善擊礮嘉慶三年四月賊將涉黑龍江為入蜀計玉伏江之東堵殺賊數人賊涉淺渡江玉用礮轟擊賊南竄玉率鄉兵以追賊拒南岸玉易之獨身渡岸擊賊為賊所執勸降玉大罵不絕鄉兵趨救賊刳其腹而去知縣擬請巡撫旌其忠因移營不果

譚福由行伍授二即壩把總嘉慶七年隨本營張泰將在盤屋屬黃柏園堵勦教匪奮勇當先身被數傷死奉

卹賞

馬萬春由行伍授華陽營外委嘉慶十一年領兵在洋縣屬

茅坪堵勦叛匪奮勇冲擊眾寡不敵身被重傷死奉

卹賞

張漢升廩生性和霽克敦孝友嘉慶十一年游幕洋縣賊猝臨迫脅不從申明大義尋以罵賊被殺奉

祀忠孝祠

林邦銘鄉飲耆賓川匪入秦邦銘所居紅廟塘扼其衝率子弟堵禦被賊所執邦銘大罵賊怒矛刺殺之闔家男婦大小赴池水死五十餘人

范瑞星武舉值教匪滋事率領鄉民奮勇格鬪身被數傷不勝而斃祀昭忠祠

霍顯周貢生住居北鄉街匪逆犯秦到處蹂躪顯周圍練民夫保守鄉鎮值賊蜂擁而至眾寡不敵賊忿其禦侮鎗刺及傷體無完膚祀昭忠祠

李天宇生員讀書明理團練義勇防守鄉村屢破賊立功為賊所害祀昭忠祠

吳爾舉生員素明大義途中遇賊匪被執誘之降爾舉慷慨諭賊大罵不屈為賊所害祀昭忠祠

焦忠孝武童入營効力隨署漢中協蘇維龍北棧堵截逆匪張漢潮官軍營扎唐藏賊四面圍合眾寡不敵忠孝奮勇護主將殺賊數人為賊所執自言為領兵官被賊刺

眼解肢與蘇協同死奏聞 恩襲雲騎尉祀昭忠祠

查邑人黃列五李恩白文在中席恩誠龍凌雲均庠生團練義勇設卡防堵於十二月二十四日同義首張桂張宗德范瑞名范瑞璽等先後皆陣亡

節烈

漢

李穆姜陳文矩妻同郡李法之姊也字穆姜有二男前妻四子文矩為安眾令喪於官四子以母非生憎毀日積而穆姜慈愛溫仁撫字益隆衣食資供皆倍所生後四子感悟自詣南鄭獄陳母之德狀已之過乞就刑辟縣言之於郡

郡守表異其母獨除家徭遣散四子許以修葺自後訓導益明並為良士穆姜年八十餘卒

秦瑛楊相妻大鴻臚劉巨公女也有四男二女相七教訓六子動有法矩長子元珍出行醉母十日不見之元珍叩頭謝過次子仲珍白母請客既至無賢者母怒責之仲乃革行交友賢人兄弟為名士秦瑛之教流於三世

杜秦姬隄為太守趙宣妻也生七男七女若元珪稚珪有望五人皆令德其教子也有規其戒諸女及婦有法後七子皆辟命察舉牧州守郡而漢中太守南鄭令多與七子同歲季考上計無不修敬秦姬執子孫禮

李文姬太尉固女同郡趙伯英妻賢而有智初固既策罷知不免禍遣三子婦幼子燹時年十三文姬密與二兄謀豫藏圖燹託言還京師有頃難作二兄受害文姬告父門生王成託以六尺之孤避難徐州十餘年遇赦還姊弟相見悲感傍人既而戒燹毋一言加於梁氏惟自引咎而已燹謹從其誨

韓樹南趙子賤妻子賤初為郡功曹李固之誅二子託服藥死具棺器欲逃子賤驗實就殺之及固幼子燹得還子賤慮燹報仇賃人刺之燹覺告郡殺子賤初樹南諫子賤不聽及臨死許共並命兄弟嫂侍婢視守之經百餘日後不防

此婦於節

義月取子死

以死耳何必

此是庸記

仍於幕下自殺

張禮修趙嵩妻姑酷惡無道遇之不以禮終無溫色及甯父母父母問之但引咎不道姑卒感悟更慈愛之鄉人相訓曰作婦不當如趙伯高婦乎後遭米賊嵩死乃碧塗面亂首懷刃託言病賊不敢逼養遺生女依父叔立義終身

北齊

夏侯氏皇甫徽妻夏侯道遷女才明有禮則子和十一歲而孤親授以經書後官至濟陰太守

宋

王氏利州路提舉劉當可之母紹定三年就養興元元兵破

蜀提刑龐授檄當可詣行司議事當可捧檄白母王氏勉之曰汝食君祿豈可辭難當可行元軍屠興元王氏義不辱大罵投江而死後當可得母喪以歸詔封和義郡太夫人

按王氏及子當可史不詳其何許人殉難興元故附誌焉

元

程鵠舉妻鵠舉在宋季被虜於興元張萬戶家為奴以虜到宦家女某氏妻之既婚三日即竊謂其夫曰觀君才貌非久在人後者何為不去夫疑其試已訢於張張善之越三日復告夫夫又訢張張命去之遂鬻於市人家後程感悟奔歸宋以蔭補官元統一海內程為陝西行省參知政事自與

妻別三十餘年未嘗再娶至是遣人往興元訪求之城南某
菴中氏已為尼旋報程移文本省遣使防護車輿至陝重為
夫婦

按元史無程鵠舉有程鵠飛疑程鵠舉係鵠飛之謠再考

明

岳氏王忠之妻永樂間忠征北戰歿遺孤信苦節育之後獲旌
黃坤貞林輝祥妻年二十二夫亡撫子惟聽官至推官次惟惠
亦成立終始一節成化間旌

賈氏陳第妻遇強暴欲污之氏罵不絕口投漢江而死時年
十五 按賈氏一作畧陽縣人

李氏陳情之妻正德辛未蜀寇出青石關氏避寇入城至
漢江不得渡寇忽至其夫與眾驚散疑夫死於水遂抱幼
子赴水死

王氏唐祿之妻年二十七夫死家貧鬻鬻衣營葬遺孤儀
五歲倫一月誓死守節儀為諸生倫居於鄉苦節四十
餘年嘉靖間御史吉奏表旌之

王氏諸生金簡之妻夫病氏割股以進夫死年二十四無子
女可依孀居五十八年郡守表以貞節

孟氏任大經之妻年二十八夫亡欲自盡時子福四歲祿二歲
翁姑勸其育子以存一綫姑勉為噉食苦節孝親子祿舉

萬曆元年癸酉鄉試十二年旌其門

李氏太學生尹來聘妻年二十九歲夫死孝養翁姑殯葬以禮于作賓隆慶庚午舉人官待詔歷任通判氏年八十五兩院旌之

朱烈女朱永寧之次女端靜寡言笑年十六字宋氏子未成禮而宋亡飲泣不食孀婦葉氏知其意動靜與俱因慰之曰我無子汝死我將何依然女終懼有再婚之命也至七日母不及視遂縊死郡邑紳上建坊曰貞烈

劉妃漢中府瑞夫人也王在潛邸當婚神宗以妃良家子聘為王妃王性好佛不近女色妃亦賦性貞潔居王宮數十年處

于後癸甲之變有總兵趙鷄子者脅王入蜀妃亦隨之王遇害妃投江水死

國朝

李烈女縣民李挺女許字田應朝年十八未及結禱而夫病故女聞訃哀號絕食數日欲隨母往而被阻莫遂乃投縊自盡邑紳上其事給就義完貞匾額並將女柩合葬夫塋

劉氏生員李漢翔之母年十九夫亡守節遺子訓讀入泮康熙五十八年給匾旌之

唐氏王世經妻年二十一夫亡子幼家貧勤機杼事繼姑得其歡心撫子作戲成立守節四十餘年雍正四年

旌表

李氏陳泗儒妻夫亡家貧有逼以改嫁者氏執意不從竟以身殉邑令顧題匾曰之死靡他

張氏毛光先妻夫早卒時姑年七十有三侍奉不急壽至期頤教養二子成立守節五十載乾隆十八年 旌表

韓貞女生員韓體道次女幼字郭汾裔未歸而汾裔卒姑趙氏貧且老女聞訃奔喪事姑生養死葬無不盡禮守貞三十餘載乾隆二十四年 旌表

王氏生員胡文之妻年二十六夫亡遺孤尚襁褓翁年老有癱疾繼姑亦春秋高氏晨昏紡績養生送死如禮教子紹德成

歲貢乾隆三十年

旌表

王氏張秉政妻年十九夫亡遺腹子毓德氏奉姑教子舉辛卯孝廉守節四十載乾隆三十九年 旌表

蔡氏王洪德妻本農家女夫外出有無賴夜入其室欲逼之蔡叱去於月色中辨識為唐氏子及明徧告隣里盼夫歸三日不至縊於室乾隆四十三年 旌表

丁氏吏目丁應徵女適同邑杜錫年十八錫亡家甚貧翁年六十餘有叔方八歲氏念事老撫幼責重一死遂矢志守節

撫堂姪為子孀居四十餘年子與叔俱成立乾隆四十八年

旌表

陳氏增生李泰來妻年十七歸李未踰年夫亡七後五月側室張氏生子而張氏又歿氏上事孀姑下撫孩抱守節三十餘年孝慈兼至子繩武入泮克繼家聲皆由母之善教云

曹氏何世秀妻年二十二夫亡遺腹子調鼎紡績事翁姑守節四十年邑令郭嵩表其門曰節厲冰霜

陳氏生員張耀妻耀亡氏年十九有七旬老姑家甚貧氏紡績以養撫親族週歲子為嗣克成立後有張氏宋氏王氏蘇氏賈氏朱氏高氏魏氏岳氏亦如之

何氏溫啟祥妻夫亡氏年十八遺孤敏方三歲氏苦志守節孝事翁姑撫子及幼叔皆成立乾隆五十三年

旌表

時有脫氏張氏范氏李氏王氏亦如之

李氏林景唐妻年二十七夫亡子採方二歲家赤貧氏日夜紡績自食糠粃另作細飯以養姑姑歿負土成墳苦節五十餘年採既長事母至孝鄉黨皆稱咸以為非此母不生此子云

鄧氏林大秀之母夫亡守節撫子教養兼至嘉慶二年賊匪到境義不受辱携子女投塘而死知府嚴如煜表其門曰一門義烈

高氏陳所經妻年二十六夫亡撫孤完操以女紅度日孝事翁姑生養死葬均能盡道親黨遇婚喪隨力助資子為

族人所虐氏善處之無怨言守節三十八年

陳氏汪朝銓妻嘉慶二年齊王氏犯紅廟塘氏避賊山中
聞朝銓被賊掠氏恐終不免乃以長子屬傭工某並釵珥給
之使逸自負幼子投池死時年二十六知府嚴如煜旌其
門曰節烈可風

張氏趙玉麟妻嘉慶二年賊匪陡至被掠罵賊不屈死
之時年二十一歲

門氏趙寶麟妻與張氏同日被掠罵賊不屈死之時年
十九歲

趙張氏趙又軒妻也于歸數載姑失明後育男女各一皆無

乳氏代姑乳之同治初髮逆陷漢氏夫被賊虜並踞其家
氏負姑行乞鄉里憐其孝多飲食之逾年夫歸賊亦
去又二年姑死喪事皆盡禮氏後不如暈現子孫繩繩
繼繼福猶未艾

王張氏王德普妻夫亡氏年二十四子女各一家人逼令再
醮母家亦勸之氏不從矢志彌堅以紡績供子讀女長擇配
嫁之弟兄與之析炊居氏晝夜辛勤卒免凍餒同治初避
賊入山路遇賊欲擄之罵賊不屈刀鎗齊下以為已死賊去
氏身受重傷不能行平定後其子又死撫兩孫均成立卒
年七十三苦節四十九年

崔氏鄭善果母三十而寡家貧其父欲奪其志崔氏抱
善果泣曰婦人無再醮之義且幸有子棄兒為不慈背夫
為無禮當割耳剪髮以明素心違禮滅慈不敢聞命云云
後教子成立家亦小康光緒四年事也

王鄧氏邑民王準楚妻二十八歲適夫病氏割股和藥以進
夫病良已逾年夫亡氏堅貞自守不出戶庭苦節二十八
年而故後里黨聞其事於縣請 旌表焉

按縣志同治光緒間烈女類為數甚繁大約其事皆相類茲
擇其最著者錄之以備一格餘不及載

又查王楊氏從九王建興之妻建興精岐黃術以醫名

家楊氏于歸後事親孝遇妯娌有禮年廿八夫病
到股和藥百計祈禱卒無效歿後伯兄千總王登
魁武而冠者逼令去楊氏之死靡他勵志苦節撫孤
子女四人賴以成立長子培桂次培林能傳父業邑
紳請於 前學院朱棠咨 旌表給以蕙心松節
匾額

